

Laboratoris e zûcs cun “Il libri gjat e “I Numaruts” Une zornade fûr par fûr par furlan

Sabide ai 11 di Mai doi events de ARLeF pai fruts,
inte suaze de Setemane de culture furlane.
Prenotazions dentri di miercus ai 8

I fruts a saran i protagoniscj di doi events promovûts de ARLeF – Agenzie regjonâl pe lenghe furlane, inte suaze de Setemane de culture furlane, inmaneade de Societât Filologjiche Furlane. Sabide ai 11 di Mai – te buinore a Martignà, tal dopomisdì a Reane – e sarà une zornade di divertiment e dute par furlan che i plui piçui si visaran ancje pai materiâi didactics che ur vignaran regalâts. Par partecipâ ai doi apontaments si à di notâsi dentri di miercus ai 8 di Mai, clamant il Sportel regjonâl pe lenghe furlane al 04321743400 o cuntune e-mail a info@sportelfurlan.eu.

La zornade e tache cun “Libris, figots e ridadis”, li de Biblioteche civiche “Elsa Buiese” di Martignà (vie Delser 33), aes 10. Un apontament realizât cu la colaborazion dal Comun e la impuartante poie inte organizazion de associazion “Chei di Martignà”. Tal program de buinore e je la leture animade de “Il libri gjat” e daûr un laboratori creatîf. I fruts dai 3 ai 7 agns a varan la pussibilitât di imparâ la lenghe zuiant, ma ancje di “figotâ” il protagonist dal libri (publicât par talian di Minibombo e inte version par furlan de ARLeF), che al vignarà dât fûr ai fruts tant che regâl. Nol è dut, parcè che dopo dal laboratori e sarà une buine mirinde par ducj.

Intal dopomisdì, aes 17, li de Biblioteche civiche di Reane (vie Battaglione Julio 7, a Remugnan) al tacarà “1, 2, 3, 4, 5... Numaruts cun Maman!”, un laboratori ludic e didatic cun Daria Miani, la condutore de transmission televisive par fruts “Maman!”, organizât cu la colaborazion de Aministrazion comunâl. I fruts a podaran cognossi i personaçs dal carton animât de ARLeF “I Numaruts”: modonuts ducj colorâts e une vore simpatics che cun chei si impare la matematiche cun cjants, zûcs e divertiment. A saran ancje proietâts dai episodis dal carton, che al va in onde propit su Maman! (su Telefriuli, ducj i vinars aes 18:30 e in repliche la domenie aes 7 e aes 13), e che si puedin viodi ancje sul sî de ARLeF e sul canâl YouTube de Agenzie. Prime di lâ vie, ducj i participants a varan un simpatic regâl tant che ricuart dal dopomisdì di divertiment cu la lenghe furlane.

Udin, ai 2 di Mai dal 2024

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<